

Plenchi

Bèl a bati

Bèlèm bèlèm yega amigunan, yega pa nos subi nos plenchi di skol. Nos a sinti boso falta pa nos por topa i pasa un ratu ameno huntu. Kue bo kòpi kòfi òf bo te, un kos pa manda boka banda di dje i pone nan na e lugá preferí di bo. Kue bo stul preferí i sinta pa nos por pasa un ratu kontentu huntu.

Hopi kos a pasa mientras tanto. Nos a sali ilieso for di orkan Mathew, el a disidí di no bin duna nos niun molester. Nos a skapa un biaha mas i ta gradisí Tata pa esaki. Tur e personanan ku a pèrde nan bida na Haiti i otro paisnan, pas na nan alma.

Despues nos tabatin elekshon. Resultado ta konosí i formashon ta andando. Nos ta konfia ku nos lo haña un gobiernu ku nos pais meresé, afterall ta nos mes a vota.

No ta tur hende ta mesun kontentu ku resultado di elekshon, pero ta eseí ta nos realidat. Tampoko tur ta kontentu ku e partidonan ku ta formando gobiernu, pero eseí ta nos demokrasia. Plenchi tin tur konfiansa ku nos ta haña un bon gobiernu. Ta hopi trabou tin, den sektor di enseñansa sigur, pues ken ku asumí e reto mester sa ku ta un responsabilidat grandi. Pero manera semper nos tei pa duna tur aporte na kualke ku sinta pa huntu nos traha ku i pa nos hóbennan.

Mientras tanto skolnan a kuminsá bék despues di un fakansi kòrtiku. Si ta bon tur skol a adaptá nan plenning despues di e dianan di skol ku a kai afó inesperá. Duru duru nos ta ban di awor te desèmber, ban pe.

Riba roster

Siman a kuminsá dushi ku sirbishi di palabra na Kolegio Sur Herman Joseph Despues bendishonnan a sigui drenta. Skol a haña un bunita kashi di regalo. Ku yudansa di mayor, yùfrou i alumnonan e lokal di kòmpiuter a keda bunita. Un danki di kurason ta bai pa sra. Magaly Hersilia, ku a sòru pa “skol haña e kashi, e mayor ku a sòru pa transporte, e yùfrou i e alumnonan ku a drecha e lokalidat.



**Den agènda
Fakansi di skol**

- **19 desember pa 4 yanuari**

Riba rapòrt

Minister Rhuggenaath na Radulphus College pa UN PINK PAARS kontra polio. E grupo di InterAct di Radulphus College ta traha riba proyektonan pa komunitat ta enkargá ku e konsientisashon aki. InterAct ta un grupo di hóben di Rotary Korsou ku ta traha pa Korsou. Nan ta siña notula, maneho finansiero i kon papia den publiko. E hóbennan ta entre 14 pa 18 año i nan ta wordu guia pa yufrou Celeste Cardoze. Dia 20 di oktober tabata dia di Polio i riba e dia aki e grupo a bai Pundo pa asina nan kolektá durante di nochí di kompra.





Mi ta konta

E prijs de amor

Tico tabata ku su yunanan di kacho a hasi 6 siman, pa e por bende nan. Nan tabata kome hopi i ya kasi e no tabatin sèn pa kumpra kuminda. El a skibi riba un bòrchi grandi “Ta bende Puppy”. Ni mei ora despues un chabalito a bin grita na su porta pa puntra tokante e pupynan.

“Kon bai mener, kuantu pa e kachonan?”. Tico a kontestá ku nan ta kosta 100 florin kada unu.

E hcabalito a koba den su saku i a saka 2, 50 i a puntra ku esaki ta yega pa kumpra un. Tico a keda wak e sèn i a sakudi su kabes. Mientras tantu tur e 4 kachonan a kore bin porta tras di nan mama kacho. E chabalito a keda enkantá. Despues el a mira te patras un di 5 kacho ta bin, e no tabatin pata dilanti. Lastra e tabata lastra riba si patanan patras.

Mesora e Chabalito a bisa Tico: “mener ese mi ke kumpra. Kuantu pé?” Tico a kontesté: “no mi yu, bo no ta mira ku e kacho ei nunka por hiba un bida normal. E lo no por kore ni hunga ku bo.”

E chabalito a hisa su pia di karson i a laga Tico wak su pia di palu. “Mi tampoko por kore manera otro muchanan pesei mi ke e kacho ei. Nos dos por kompronde otro bon.”

Tico su wowo a yena ku awa. Ora e chabalito a dune e 2,50, el a kontesta: “no mi yu, pa amor berdadero no sa kobra. Esei ta gratis.

Mucha djispou

Tony: “Papi, kon papi ta sinti di ta tata di un yu ku bon tipo”

Tata: “Bo sa no mi yu, mi no tin idea. E pergunta ei ta na opa bo mester hasie. E si tin eksperensha ku ese.”